

# ORANG ISLAM YANG TERKEMUKA

## HASSAN AL-BANNĀ

“Ini ialah kenangan-kenangan yang tidak saya lupakan selama hidup”.

– Sa‘īd Ramaḍān



13 Februari 1949

Sesudah sembahyang Subuh, duduklah saya menulis beberapa perkara mengenai muktamar Islam, kemudian saya balik lalu saya dapati khabar berita kemalangan besar yang mengejutkan. Hampir-hampir tidak saya percaya kejadiannya!! Tangan saya tidak terdaya menggerakkan kalam! Perbunuhan Ḥassan al-Bannā . . . saya tidak percaya! Dusta!! Tidak, bahkan betul, beritanya telah dipancarkan oleh radio: Malam tadi penganjur besar itu telah terbunuh lalu dibawa ke Hospital Kuyuf dengan darahnya yang suci, dan pada malam itu juga rohnya beredar ke tempat yang tinggi! Dengan meninggalkan kami di atas muka bumi menderita kejahatan dan pahit maung dunia! Ia telah dibunuh oleh tangan yang berdosa yang telah melakukan jenayah kepada Islam dengan kejahatan yang sebesar-besarnya.

Wahai pemimpin besar, sejahtera atasmu barang di mana engkau berada! Di dalam kesucian dan tempatmu yang tinggi, Allah jua membalasmu dengan sebaik-baik balasan sebagai seorang pemimpin daripada murid-murid dan pengikutnya.

Ḥassan al-Bannā adalah seorang imam – seorang penganjur,

menurut sepenuh-penuh makna perkataan penganjur, ia menjadi contoh yang utama dalam segala-galanya: Dalam ilmunya, dalam imannya, dalam ikhlasnya, dalam kecergasannya, dalam ketajaman akalnya, dalam halu pengecamannya, dalam hatinya yang besar lapang dan dalam jiwanya yang suci.

Ḥassan al-Bannā adalah hujah Allah pada diriku sebagai menjadi dalil bahawa Islam itu membentuk orang-orang besar, mencipta perkara-perkara yang mulia yang menjadi contoh utama, dan menempa nur yang persih daripada daging dan darah.

Ia adalah akal yang besar dan jiwa yang berhubung dengan rahsia yang tertinggi yang tidak berhenti-henti menyebut dan mengingat Allah. Ia adalah kemuncak yang menyaputi awan, mempunyai ketinggian, perdirian yang teguh dan kekuatan orang-orang pada zamannya. Ia adalah seorang besar, yang mendapat taufik dan tidak menyalahi jalan yang sebenarnya. Ia bukan sahaja menarik orangnya bahkan telah memenuhkan hati kami dengan perasaan kasih kepada Tuhan ‘Azza wa Jalla. Ialah yang telah menyalakan dada kami dengan perasaan kasih kepada Islam, dan melebur kami – seperti leburnya emas di atas api – di dalam acuan

yang bersih suci.

Hassan al-Bannā telah dibunuh orang pada suatu hari yang sangat gelap di dalam sejarah. Dengan hilangnya maka kemanusiaan telah kehilangan seorang manusia yang jarang sekali zaman melahirkan seperti.

Hassan al-Bannā telah dibunuh orang, sesudah dua puluh tahun dihabiskan olehnya terus-menerus siang malam dalam berjihad dengan pahitnya.


Saya tidak akan lupa lawatannya ke kampung-kampung, dengan hanya tidur dua atau tiga jam pada tiap-tiap hari. Saya tidak akan lupa tentang ia berjaga malam di ibu pejabat (Pertubuhan al-Ikhwān al-Muslimīn), atau di rumahnya, atau pun di pejabat majalahnya “*al-Shahāb*” menyelenggarakan kerja-kerja seruan Islam. Saya tidak akan lupa air matanya yang selalu berlinang dengan tidak diketahui oleh orang ramai kerana meratapi umat Islam.

Suaranya yang mendalam dan merdu, imannya yang hidup

melimpah, jiwanya yang bersinar-sinar, yang dengannya saya telah mengenal Allah, yang cahayanya telah meliputi saya sepanjang masa tujuh tahun, adalah suatu mimpi yang besar ertinya kepada saya.

Penganjur yang menakjubkan ini yang telah membangkitkan umat dari jurang yang dalam, yang telah menggerakkan dengan gegaran yang kuat sehingga mengalirkan hidup dalam hatinya dan tidak dibiarkannya melainkan setelah meninggalkan dalam kalangan keturunan (pengikut-pengikut) yang mulia, yang berjiwa hidup, yang mengenal Tuhan dan menunaikan kewajibannya.

Penganjur ini yang telah menjadi harapan yang hidup, dihantar oleh rahmat Tuhan ‘Azza wa Jalla dalam masa suatu zaman yang terlalu gelap dan penuh dengan perbuatan fasik dan tidak terkawal, ialah orangnya yang telah dibunuh, suatu pembunuhan kejam yang akan berkekalan menjadi suatu kecacatan yang menodai nama baik Mesir dan orang-orang Mesir. Jasa dan kebaikan penganjur besar itu telah dibalas dengan balasan yang seburuk-buruknya.



*Suatu pemandangan di bandar Karachi.*